

Meeqqat atuarfianni fagini tamani akunnernut ilinniartitsiviusussanut minnerpaaffiliinissaq anguniarlugu inatsimmut atuuttumut allannguutissatut siunnersuummik saqqummiussinissamut Naalakkersuisut peqquneqarnissaannut inatsisartut aalajangiiffigisassaattut siunnersuut. Inatsisip allanngortinneqarneranittaaq akullerni atuartuniit tuluttut danskisullu akunnerit ilinniartitsiviusut amerlaqatigiilernissaat qulakkeerneqassaaq. Allannguut aggustimi 2020-mi atuutilissaaq.

(Inatsisartuni ilaasorta q Mimi Karlsen, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Aappassaaneerinnineq

Naalakkersuisut aallarniutigalugu aammaarlutik siunnersuuteqartoq siunnersuutaa pillugu qutsavigissavaat.

Naalakkersuisullu aamma Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq siunnersuummut atatillugu suliaat pillugit isumaliutissiissutaallu pillugu qutsavigaat.

Ataatsimiititaliaq isumaqatigiittoq allannguutissatut siunnersuuteqarpoq.

Naalakkersuisut siunnersuut aamma isiginiagassat siunnersuutip tunuaniittut paasisinnaavaat. Taamaattumik Naalakkersuisut aamma ilalersinnaavaat siunnersuummi immikkoortut aappaat, taamaasillunilu apeqqut nalunaaquttap akunneri atuartitsiviusussat amerlassusissaat tuluttut aamma danskisut akullerniit atuartitsinerni, immikkut ilisimasalinnik suleqatigiissitami meeqqat atuarfianni oqaatsinik piginnaangorsarneq pillugu suliaqartumut ilanngullugu suliaannngortinneqarsinnaalluni.

Immikkullu ilisimasalinnit inassuteqaatit aamma meeqqat atuarfianni minnerpaamik piunasaqaataasussanik nalunaaquttap akunneri atuartitsiviusartussanik fagini tamani imaqtartussaammata, apeqqummut tamatumunnga isummernissaq aamma immikkut ilisimasallit inassuteqaateqarnissaannut utaqqisariaqarpoq.

Tamannalu tunuliaqutaralugu Naalakkersuisut imaattumik allannguutissatut siunnersuuteqarput:

”Inatsisartut aalajangiiffigisassaattut siunnersuut, Naalakkersuisut peqquneqassatut meeqqat atuarfianni atuartitsinermi nalunaaquttap akunneri minnerpaamik fagini tamani atuartitsiviusussat pillugit apeqqut oqaatsinik piginnaangorsarnermi immikkut

*ilisimasallit suleqatigiissitat suliaasa allasimaffiannut ilanngunneqassasoq.
Tamatumunngalu atatillugu Naalakkersuisut peqquneqassapput nalunaaquttap akunneri
atuartitsiviusartut tuluttut aamma danskisut akullerni atuartitsinermiit aallartittutut
suleqatigiit suliaasaannut allasimaffimmi ilanngunneqassasoq.”*